

IN MEMORIAM

Dolf Hoevertsz, Ex rector di Colegio Arubano:

Rector emeritus di Colegio Arubano Sr. Richard Harms

Diabierna 16 di October e noticia a yega cerca nos cu Sr. Richard Harms a bay sosega na paz despues di un lucha tenaz. Richard a pasa pa motibo di su enfermedad e ultimo lunanan na Colombia en busca di su cura, pero lastimamente esey no a logra y el a bay laga nos for di e bida aki na mundo. Cu Dios duna Richard su sosiego eterno. Richard tabata un gran Arubiano y hopi conoci den nos comunidad. Di 1972 te 1979 e tabata rector di Colegio Arubano. Por cierto e prome rector Arubiano. Esunnan cu a conoce Richard sa cu el a cumpli cu e funcion aki na un manera ehemplar. El a pone un standard pa tur

su sucesornan.

Pa por comprende e gran valor di e gran persona aki, no solamente pa Colegio, pero tambe pa henter nos comunidad, nos mester ta na haltura di e posicion di Colegio Arubano dentro di e comunidad Arubano desde su fundacion na aña 1959. Colegio tabata e instituto di Enseñansa di e nivel mas halto di Aruba. Eynan tur e studiantenan di mas sabi di Aruba tabata. Den cara di pueblo e docentenan tambe tabata conoci pa esunnan di mas studia y sabi di Aruba. Richard, cu su “MO-B akte wiskunde”, tabata e prome Arubiano full cualifica pa duna les na HBS. Den e

ambiente elitario aki di enseñansa Richard a cuminsa su carera na Colegio, e scol conoci pa su poblacion domina pa Hulandesnan na Aruba.

Hende por imagina con dificil e tabata pa un Arubiano den contexto social ey, despues di a custumbra cu rectornan Hulandes, pa logra haya aceptacion di tur hende pa por dirigi e bastion di tur sabiduria cu Colegio tabata segun e percepcion di casi tur hende na Aruba. Su mes docentenan, cu pa 90 porciento tabata procedente di Hulanda, tabata weita e desaroyo na nan scol “met argusogen”. Richard a lucha hopi duro mes, y pa motibo

di su gran inteligencia y capacidad pa lidera, cu tempo a logra transforma su scol den un Colegio caminda calidad di enseñansa a keda na un nivel mes halto a pesar cu aña pa aña e poblacion a bira Arubiano, tanto e alumnonan como e docentenan. Colegio no por a keda den bista di Richard y hopi mas hende na Aruba un scol elitario, ma mester a bira un scol cu acceso pa mas tanto muchanan Arubiano posibel. Na mi opinion esaki tabata un gran logro di Richard pa nos comunidad.

Fuera di su gran labor na Colegio, Richard tabata tambe un persona hopi activo den mundo cultural di Aruba.

Pa hopi aña el a hunga un rol prominente den e grupo “Mascaruba” y a actua pa hopi aña den Cas di Cultura.

Dia cu Richard a laga Colegio e no a termina su mision pa enseñansa. El a cumpli un par di aña un puesto como inspector pa MAVO, HAVO y VWO. y a clausura su carera den enseñansa como Director di Departamento di Enseñansa di Aruba.

Awo Richard a bay laga nos. Un tristesa grandi a keda atras pa nos tur, principalmente pa Betsy y nan yiunan Monique, Ghislene Ricky, nietonan y demas famia. Mi ta extende palabranan di forsa pa tur. Cu Richard sosega na paz. □